

UCAPAN PERDANA MENTERI DI PEMBUKAAN RASMI KILANG SYARIKAT MEGA CHEMICALS DI SHAH ALAM, SELANGOR PADA 19^{HB} OGOS, 1972

Y.M. Raja Ayub. Pengerusi Mega Chemicals, Encik J. D. Murdock, Encik Lim Kwan Hua, Y.B. Menteri-menteri, Tuan-tuan dan Puan-puan.

Terlebih dulu sukaiah saya mengucapkan berbanyak-banyak terimakasih kepada Pengerusi Syarikat Mega Chemicals dan seterusnya kepada syarikat-syarikat anak iaitu Besimega dan Chemetics Mega atas jemputan kepada saya petang ini.

Saya rasa inilah satu peristiwa yang unique atau istimewa kerana sekali gus merasmikan dua buah syarikat yang baru dan kilangnya.

Seperti yang dikatakan oleh Pengerusi tadi, Besimega dan Chemetics Mega ini adalah hasil usaha syarikat induknya setelah berjalan enam tahun lebih. Saya sukaiah mengambil kesempatan ini mengucapkan terimakasih kepada Chemetics International Canada yang turut serta menjayakan projek ini. Saya sukacita juga bahawa Pernas turut mengambil bahagian meskipun secara kecil sahaja.

Tuan-tuan dan Puan-puan,

Seperti yang pernah saya katakan di masa lalu, hari depan Malaysia bergantung pada kejayaan kita menukarkan corak traditional ekonomi kepada corak ekonomi moden. Dengan kata-kata lain, meskipun buat beberapa lama negara akan bergantung pada ekonomi pertanian atau agrarian economy, lambat laun kita mestilah berubah menjadi masyarakat perindustrian atau industrial community, hidup sebagai modern industrial society. Hanya dengan demikian, barulah kita dapat maju ke depan seimbang dengan masyarakat negara-negara moden seperti di Amerika, Eropah dan Jepun.

Bagaimanapun, usaha meningkatkan taraf kita menjadi industrial nation bergantung bukan saja pada kesediaan dan kesanggupan local entrepreneurs. Kita masih memerlukan investment dari luar dan lebih-lebih lagi technical know-how dan expertise

pada kedua-dua jurusan iaitu production dan marketing. Barangkali sudah banyak ditegaskan bahawa perindustrian negara kita telah mula berubah daripada import substitution stage kepada export-oriented stage supaya dapat bersama-sama mengambil bahagian dalam bidang external trade yang semakin meluas. Saya percaya potential investors di dalam dan luar negeri tentulah memaklumi sepenuhnya kemudahan dan incentives yang terbuka kepada mereka dalam hubungan ini.

Tuan-tuan dan Puan-puan,

Selaras dengan pandangan baru ini, Kerajaan telahpun memperkemaskan susunan dan langkah yang berkait dengan perindustrian. Peraturan telahpun dipersetujui dengan Kerajaan-kerajaan Negeri supaya pengurusan industrial estate dijalankan oleh SEDC atau PKEN masing-masing dan dengan demikian FIDA akan diperkuatkan dengan menambah tenaga pegawainya, terutama professional dan teknikal. FIDA sedang bertindak lebih dinamis berusaha menyalurkan investment yang lebih banyak ke negara kita.

Tuan-tuan dan puan-puan,

Berpaling semula kepada Syarikat Mega Chemicals dan syarikat-syarikat anaknya, saya sukacita bahawa salah sebuah kilang ini memberi sumbangan besar kepada pembangunan pertanian dengan mengeluarkan bahan-bahan chemical yang perlu iaitu chlorate.

Besimega Sdn. pula ialah sebuah syarikat terulung di negara ini yang membuat "expanded steel structural elements". Kilang ini adalah satu-satunya kilang pembuat bahan besi ini di rantau ini yang berdasarkan kepada satu proses yang direka oleh Professor Hideyo Watanabe dari Tokyo Institute of Technology. Keluaran-keluaran syarikat ini adalah untuk kegunaan perusahaan-perusahaan pembinaan dan ianya adalah ekonomikal daripada rangka-rangka besi waja biasa yang digunakan.

Tetapi yang lebih menarik kepada saya ialah cara pengeluarannya yang moden dan dengan ini memberikan peluang latihan kepada pekerja-pekerjanya. Peluang latihan amat perlu pada peringkat kita sekarang ini supaya memberikan persediaan tenaga terlatih yang lebih ramai bagi bidang perindustrian masa depan.

Tidak syak lagi, kesetabilan politik, suasana aman dan ekonomi yang berkembang pesat dalam negara telah membolehkan banyak syarikat-syarikat yang melabur modal di negara ini maju dalam

perusahaan mereka. Malah banyak di antaranya yang mendapat keuntungan yang amat besar. Saya berharap syarikat-syarikat yang mendapat keuntungan besar itu melaburkannya semula dalam negara ini untuk mempercepatkan perkembangan ekonomi negara ini.

Begitu juga saya berharap syarikat-syarikat yang besar dan maju akan mengambil peranan yang cergas melalui sponsorship programmes dalam usaha-usaha kebajikan rakyat.

Tuan-tuan dan puan-puan,

Tidak berapa lama lagi negara kita akan menyambut hari ulang tahun yang ke lima belas. Kita telah sampai pada peringkat dan kemajuan negara. Kita boleh memandang kepada masa depan yang cerah, membawa harapan baru ke arah kemakmuran dan kebahagiaan.

Dengan kata-kata itu, saya dengan sukacita merasmikan Kilang Besimega dan Chematics mega ini.